

唐會要



唐會要卷二十二

宋

王

溥

撰

社稷

舊儀注祭犧牲不得捶扑傷殞死則埋之若有創病者
別卜

武德九年正月親祀太社詔曰吉日惟戊親祀太社率
從百僚以祈五穀今既南畝俶載東作方興州縣致祀
宜盡祗肅四方之人咸勤殖藝別其姓類命爲宗社京
邑庶士臺省羣官里閭相從共遵社法以時供祀各申

祈報具立節文明爲典制

咸亨五年三月十日詔春秋二社本以祈農比聞除此之外別立當宗及邑義諸色等社遠集人眾別有聚歛遞相承糾良有徵求雖於吉凶之家小有裨助在於百姓非無勞擾自今以後宜令官司禁斷

神龍元年五月詔于東都建置太社禮部尚書祝欽明問禮官博士曰周禮田主各用所宜之木今太社主用石何也禮官太常少卿韋叔夏國子司業郭山暉太常博士張齊賢尹知章議曰春秋傳曰君以軍行被社爨

鼓祝奉以從書曰不用命戮于社社之主蓋用石爲之奉謂將行也是鄭元以社主用石崔靈恩三禮義宗曰社之神用石以土地所主最爲實故用石也又呂氏春秋云殷人之禮其社用石後魏書云天平四年四月太社石主遷于社宮是社主用石古有明說周禮田主各用所宜之木者彼謂人間之社非太社也又檢舊社主長一尺六寸方一尺七寸付禮官博士等議其制度禮官韋叔夏等又議曰社主制度長短在禮無文且天子親征又載社主謂之社事則社之神主可載而行今詳

議以爲主旣可載明非過重按郊特牲云社祭土而主陰氣韓詩外傳云天子大社方五丈諸侯半之蓋以五是土數故壇方五丈其社主請准五數長五尺准陰之二數方二尺剡其上以象物生方其下以象地體埋其半以根在土中而本末均也則神道設教法象有憑其尺請用古尺又檢舊社稷壇上四方設以方色唯中央數尺飾以黃土韋叔夏等又議曰韓詩外傳云天子太社廣五尺各分置四方色訖上冒以黃土說者云冒以黃土者象王者覆被四方據此則合用黃土遍覆壇上

今檢舊壇之上亦備方色唯中央數尺飾以黃土則是覆被之道有所不及旣乖舊制望請准古改造于是以方色飾壇之四面及四陛其上則以黃土覆之祝欽明又建議曰周頌載芟篇叙曰春藉田而祈社稷也禮記天子爲藉千畝諸侯爲藉百畝卽此緣有藉田自爲正社王社侯社因此有名卿大夫以下無藉田所以成羣置社藉田壇祭止是王社往者直云藉田近日改名先農之祭不知王社根本魏世妄設三牢羣說紛紜乍毀乍立晉氏徒云省費不知仍在藉田千畝共迷其日固

久不詳經典致此誼譁今者創立社稷理宜正名典故
請改儀注及式將先農以爲帝社使人聽不惑古義具
存移前代之末學表當今之準繩豈不美歟諸禮官審
加詳議禮官韋叔夏博士張齊賢等議曰謹按祭法云
王者立太社然王社所祭之處書傳無文漢書郊祀志
漢興已有官社未立官稷遂于官社後立官稷以夏禹
配食官社以后稷配食官稷臣瓚云案高紀立漢社稷
所謂太社也時又有官社配以夏禹所謂王社也見漢
祠令而未立官稷至此始立之光武中興不立官稷相

承至今魏以官稷爲帝社故摯虞議曰魏氏故事立大
社帝社是也晉初或廢或置皆不言當時所置之處或
云兩社同處王社在大社之西崔氏皇甫氏並云王社
在藉田引詩藉田而祈社稷爲證今謹案衛宏漢舊儀
春始東耕於藉田官祀先農則神農也又五經要義云
立壇于田所以祠先農壇之制度如壇魏秦靜議云風
伯雨師靈星先農與社稷爲國之六神晉太始四年上
耕于東郊以太牢祀先農又周隋舊儀及皇朝新禮先
農皆祭帝神農配以后稷是則王社先農其來自遠各

在祀典不可合而爲一今欲崇立帝社實違禮經望於
藉田之中別立帝社帝稷配以禹棄則先農帝社兩祠
咸秩協載芟之義符祭法之文祝欽明又議曰藉田之
祭本是王社承前若祠先農共是勾龍后稷烈山之子
亦謂之農周棄繼之皆祀爲稷共工之子后土主名湯
旣勝夏欲遷不可社稷主祭唯此二神祭法所載祀典
皆存自黃帝以下義農二皇不列常祀豈有社稷之祭
上取炎皇止經典籍曾無此語膚淺諸儒妄爲曲說假
如蜡主先嗇鄭元云若神農徒見易之採木卽云若神

農耳如其遠推遂古磨振在神農前將爲先嗇有何不
可此鄭之謬妄不尋祭法根源後儒守株卽以爲定始
立社稷祈報惟祭共工烈山神農未報大功何不遠取
祈報卽明三皇以上樸畧洪荒帝王之道無取爲教魏
秦靜者又何知社稷先農妄分爲二且六宗之義先儒
猶且紛然六神之言秦靜憑何分析習俗迷認殊不可
依豈有一藉田中置四壇墀先農王社同貫異名固是
一種后稷勾龍更無二道同途分祭四牢徒費豈是爾
愛其羊又言漢祀禹神此義更殊未得若將禹平水土

其功大於勾龍成湯革夏社時何不替勾龍之祀周棄
既將易祀夏禹寧可獨遺漢德不逮殷湯祀禹無乃爲
諂後王更無遵用明其一時謬僻禮官今欲效僻張禹
無乃迂乎前以王社沒于先農欲依祀典正號今乃更
加兩祀亦恐刺謬增多退傳禮官更加詳度具依經訓
勿據俗儒於是韋叔夏張齊賢等又奏曰謹按經典無
先農之文禮記祭法云王自爲立社曰王社先儒以爲
其社在藉田之中詩載芟云春藉田而祈社稷是也永
徽中猶名藉田垂拱以後刪定始改爲先農與社本是

一神妄有改張以惑人聽其先農壇且請改爲帝社壇
以應禮記王社之義其祭先農禮改爲帝社禮仍令用
孟春吉亥祀后土以勾龍氏配之從之於是改先農壇
爲帝社壇于帝社壇西置帝稷壇禮同太社太稷其壇
不備方色所以異于太社也至開元定禮除帝稷之議
祀神農氏於壇上以后稷配至今以爲常典也

開元十九年正月二十日勅普天率土崇德報功饗祀
惟殷封割滋廣非可以全惠養之道協靈祇之心其春
秋二時社及釋奠天下諸州府縣等並停牲牢惟用酒

唐會要 卷之五
甫務存修潔足展誠敬自今以爲常式至二十二年三月二十五日勅春秋祈報郡縣常禮比不用牲豈云血祭陰祀貴臭神何以歆自今以後州縣祭祀特以牲牢宜從常式其年六月二十八日勅大祀中祀及州縣社稷依式合用牲牢餘並用酒脯至貞元五年九月十二日國子祭酒包佶奏春祭社稷准禮天子社稷皆太牢至大曆六年十月三日勅中祀少牢社稷是中祀至今未改勅旨宜准禮用太牢天寶元年十月九日勅社爲九土之奠稷乃五穀之長春祈秋報祀典自尊如聞祭

官祇事不全備禮朕永惟典故務在潔誠俾官吏之盡心庶蒼生之蒙福今後祭官等庶事之間倍宜精潔兩京委御史臺諸郡委採訪使有違犯者具錄聞奏其社壇側近仍禁樵牧其百姓私社亦宜與官社同日致祭所由檢校三載二月十四日詔社稷列爲中祀頗紊大猷自今以後社稷及日月五星並升爲大祀仍以四時致祭諸星爲中祀長慶三年正月祠部員外充太常禮院修撰王彥威奏謹按禮云社者神地之道也郊特牲而社稷太牢鄭元以爲國中之神莫貴于社故前古爲

大祀至天寶三載二月十四日勅云祭祀之典以陳至敬名或不正是相奪倫况社稷孚祐百世蒙福列爲中祀頗紊大猷自今以後昇爲大祀爾後因循又依開元禮爲中祀然而牲用太牢太尉攝行事祭之日不坐並是大祠之義列爲中祀是因循謬誤教人報本未極崇嚴有國之儀唯此厭屈今請准勅升爲大祀庶合禮中從之開成五年十一月吏部奉准四年正月詔書大祠並差三品以上官充祭太社太稷攝司徒司空並合差三品官行事伏緣諸司三品官員額絕少其中或有假

故無官可差其每年祭太稷攝司徒司空請准舊例取左右庶子少詹事及諸司少卿監通攝制可

祀風師雨師雷師及壽星等

天寶四載七月二十七日勅風伯雨師濟時育物謂之小祀頗紊彝倫去載衆星以爲中祀永言此義固合同升自今以後並宜升入中祀仍令諸郡各置一壇因春秋祭祀之日同申享祠至九月十六日勅諸郡風伯壇請置在社壇之東雨師壇在社壇之西各稍北三十步其壇卑小於社壇其祀風伯請用立春後丑祀雨師立

夏後申所祭各請用羊一邊豆各十簋簋俎一酒三斗
 應緣祭須一物已上並以當處羣公廨社利充如無卽
 以當處官物充其祭官在祭社例取太守以下充五載
 四月十七日詔曰發生振蟄雷為其始畫卦陳象威物
 效靈氣實本于陰陽功乃施于勳植今雨師風伯久列
 于常祠唯此震雷未登于羣望其以後每祭雨師宜以
 雷師同壇祭其牲別置祭器至貞元二年四月二十三
 日詔問禮官其風師雷師祝版署訖合拜否太常博士
 陸淳奏曰以是小祠在禮又無至尊親祭之文今雖請

御署校詳經據並無拜禮詔曰風師雨師為中祠有烈
 祖成命況在風雨至切蒼生今禮雖無文朕當屈己再
 拜以申子育之意仍永為常式

本是小祀開元禮無樂章及升為中祀乃用登

歌一部天寶以來嘗借天帝樂章用之本太常卿董晉奏請補其闕至貞元六年五月十四日詔秘書監包佶補之雨師亦准此風師壇舊在通地門外道北二里貞元三年閏五月二十一日以宮城墮呼屬于宿敬又近年七月二十一日遣太常少卿裴郁致祭告移之其四年四月詔有司自開元以來升風師雨師為中祀假郊

廟樂章未奏撰遂令于邵等分撰之六年五月以風師雨師武成王等樂章付有司施行之

元和十五年太常禮院奏來年正月三日皇帝有事于南郊同日立春後丑祀風師按周禮大宗伯以禋燎祀風師鄭元云風箕星也故令禮立春後丑于城東北就箕星之位爲壇祭之禮祀昊天上帝于圜丘百神咸秩箕星從祀之位壇之第三等伏以皇帝有事南郊編祭之義百神咸在其五方帝并日月神州以下緣對昊天上帝皇地祇尊不得申並爲從祀悉無上公行事并御署祝版之儀風師旣是星神厭降之儀便當陪祭如非遇郊祀其時祭祀如常儀

開元二十四年七月十二日有上封事者言月令云八月日會于壽星祠于大社壇享之勅曰宜令所司特置壽星壇常以千秋節日修其祀典二十六日勅壽星壇宜祭老人星及角亢七宿著之常式

嶽瀆

武德二年十月二十九日親祠華岳舊儀嶽瀆以上祝版御署訖北面再拜證聖元年有司上言曰伏以天子父天而母地兄日而姊月于祀應有再拜之儀謹按五嶽視三公四瀆視諸侯天子無拜公侯之禮臣愚以爲

失尊卑之序其日月以上請依舊儀五岳以下署而不拜制可之

開元十一年四月二十六日勅霍山宜崇飾祠廟秩視諸侯蠲山下十戶以爲洒掃晉州刺史春秋致祭

二十五年十月八日勅三時不害百穀用成遂使京坻遍于天地和平之氣旣無遠而不通禋祀之典亦有所而必報宜令中書令李林甫等分祭郊廟社稷尚書左丞相裴耀卿等分祭五岳四瀆至二十八年十月三日勅感而遂通神之鑒也祈而必報禮之經也今農以畢

功歲則大稔京坻之積寰海攸同用陳蠲潔之薦以答明禋之祉宜令侍中牛仙客等分祭郊廟社稷岳瀆等其四海四鎮及名山岳瀆使有道路山過者亦宜便祭至天寶元年十二月二十八日詔今歲西成頗爲善熟宜令光祿卿嗣鄭王希言等分祭五岳其四瀆名山並委所由郡長官擇日致祭至大寶七載十一月十七日朕祇肅羣祀祈在三農冀幽贊之有憑必昭報而無闕宜令工部尚書郭虛二等分祭五岳四瀆八載九月三十日詔稼穡豐穰羣官樂業思崇聖秩用展虔誠宜令

宗正卿裴信王璆分祭五岳四瀆又至天寶十載二月二十一日遣嗣吳王祗等分祭五岳四瀆具行冊禮至貞元二年八月詔太常卿裴郁等十人各就方鎮祭岳瀆等舊禮皆因郊祀望而祭之天寶中始有遣使祈福之祀至德中又加西嶽金天王中嶽中天王及諸岳瀆王公之號今用遣使之禮非正也其年五月十五日太常卿董晉奏五岳四瀆准開元禮每年各以五郊迎氣日祭之其祝版並合御署至上元元年中祠小祠一切權停自後因循不請御署其祝版欲至饗祭日所司准

呈先進取御署附驛發遣勅旨宜依仍委所司每至時先奏附中使送往十二年二月太常博士裴堪奏謹按舊儀嶽瀆以祝版御署訖北面再拜證聖元年有司上言曰伏以王者父天母地兄日姊月於禮應有再拜之儀謹按五嶽視諸侯之禮其日月以上請依舊儀五岳以下署而不拜制可至開元修理五嶽四瀆皇帝無親祭禮儀其祝文皆云嗣天子某謹遣某官敢昭告于某嶽某瀆之神讀訖皆申再拜祭五龍神但云獻官再拜此則有司行事皆有拜文今臣與禮官等通詳典制整

辨所宜伏聞禮擬于時議則求古無文可質正者則推類以明之臣愚以爲三才之尊各申所極尊有所統禮亦宜差若無比視何以辨等故禮云五嶽視三公四瀆視諸侯其餘山川視伯子男議者以岳瀆旣比公侯則禮如人臣矣其于祭也則人君不合有拜臣之儀謹按五經通義云星辰日月五岳四瀆皆天地之別神從官也因郊而祭者緣天地之意亦欲及之也又禮記云非其臣則答拜鄭元注云不臣人之臣也則星辰嶽瀆旣是天地從官恐人君不得如公侯之禮而臣下之也何

以言之王者父天母地兄日姊月星辰視昆弟嶽瀆視公侯以此明之星辰嶽瀆是天地之臣也秩視人臣也陛下與天地爲子遣使申祭恐不合令受天父地母從官之拜宜有以答之故開元禮祭岳瀆祝文皇帝稱名又云謹遣于義有必拜之文是國家著禮以明神爲敬不以臣下爲禮以臣等所見並請依證聖元年定制有司行事須申拜禮

前代帝王

顯慶二年七月十一日太尉長孫無忌議曰謹按祭法

云聖王之制祀也法施于民則祀之以死勤事則祀之
 以勞定國則祀之能禦大災則祀之能捍大患則祀之
 又云堯舜禹湯文武皆有功烈于民及日月星辰民所
 瞻仰非是族也不在祀典唯此帝王合與日月同例常
 加祭享義在報功爰及隋世並遵斯典其漢高祖祭法
 無文但以前世及今多行秦漢故事始皇無道所以棄
 之漢高典章法垂于後自隋以上亦在祀例伏惟大唐
 稽古垂化網羅前典唯此一禮咸秩未申令親禮及令
 無祭先代帝王之文今請幸遵故實修附禮文令三年

一祭仍以仲春之月祭唐堯于平陽以契配祭虞舜于河

東以臯陶配祭夏禹于安邑以伯益配祭殷湯于偃師以伊尹配祭周

文于鄠以太公配祭武王于鎬以周公召公配祭漢祖于長陵以蕭何配

詔可

麟德二年車駕東幸將封岱嶽十一月至滎陽頓祭紀
 信墓贈驃騎大將軍

開元二十二年正月一日詔自古聖帝明王岳瀆海鎮
 用牲牢餘並以酒脯充奠祀其年十一月六日雲州置
 魏孝文帝祠堂有司以時享祭州有魏故明堂遺址乃于其上置廟焉

天寶二年三月二十八日追尊皐陶為德明皇帝涼武昭王為興聖皇帝各與立廟每歲四季月享祭至寶應時禮儀使杜鴻漸請停四時享獻三載五月二十二日置周文王廟以同德十人四時配享六載正月十一日勅三皇五帝創物垂範永言龜鏡宜有欽崇三皇伏羲以勾神農以祝軒轅以風后五帝少昊以蓐顓頊以元芒配高辛以稷契配唐堯以羲仲和叔配虞舜以夔龍配其擇日及置廟地量事營立其樂器請用宮懸祭請用少牢仍以春秋二時致享共置令丞令太常寺檢校七載五月十五日詔上

古之君存諸氏號雖事先書契而道著皇王緬懷厥功寧忘咸秩其三皇以前帝王宜於京城內共置一廟仍與三皇五帝廟相近以時致祭天皇氏地皇氏人皇氏有巢氏燧人氏其祭料及樂請准三皇五帝廟以春秋二時享祭歷代帝王肇跡之處未有祠宇者所由郡置一廟享祭取當時將相德業可稱者二人配享夏王禹

都安邑今夏縣以虞伯益秩宗伯夷配殷王湯都亳今穀熟縣以阿衡伊尹左相仲虺配

周文王都鄴今咸陽縣見有廟以師鬻熊齊太公望配周武王都鎬請入文

王廟同享太師周公太保召公配秦始皇帝都咸陽丞相李斯將軍王翦配

漢高祖起沛

今彭城縣太傅張良相國蕭何配

後漢光武皇帝起南陽

司徒鄧禹將

魏武皇帝都鄴

侍中荀彧太尉鍾繇配

晉武帝都故

洛陽

司空張華大將軍羊祜配

後魏道武皇帝起雲中

太尉長孫嵩尚書崔元伯

配周文帝起馮翊

尚書蘇綽大將軍于謹配

隋文帝封隋漢東

僕射高頴

大將軍賀若弼配

令郡縣長官春秋二時擇日粢盛蔬饌時果

配酒脯潔誠致祭其忠臣義士孝婦烈女史籍所載德

行彌高者所在宜置祠宇量事致祭殷相傳說

汲郡殷太

師箕子

汲郡宋公微子

睢陽郡

殷少師比干

汲郡齊相管夷吾

濟南郡

齊相晏平仲

濟南郡

晉卿羊舌叔向

絳郡魯卿季孫行

父魯郡鄭卿東里子產

滎陽郡

燕上將軍樂毅

上谷郡

趙卿藺

相如趙郡

楚三閭大夫屈原

長沙郡

漢大將軍霍光

平陽郡漢

太傅蕭望之

萬年郡

漢丞相邴吉

魯郡

蜀丞相諸葛亮

南陽郡

以上忠臣一十六人周太王子吳太伯

吳郡

伯夷叔齊

並河

東郡吳延陵季札

丹陽郡

魏將段干木

陝郡

齊高士魯仲連

濟南

郡楚大夫申包胥

富水郡

漢將軍紀信

華陽郡

以上義士八

人周太王妃太姜

新平郡

周王季妃太任

扶風郡

周文王妃

太姒

長安縣配享文王之廟

魯大夫妻敬姜

魯郡

鄒孟軻母

魯郡陳宣

孝婦睢陽郡

曹世叔妻大家

扶風郡

以上孝婦七人周宣王

齊姜長沙郡衛太子恭姜汲郡楚莊樊姬富水郡楚昭王女富水

宋公伯姬睢陽郡梁宣高行陳留郡齊杞梁妻濟南郡趙將

趙抃母趙郡漢成帝班婕妤扶風郡漢元帝馮昭儀咸陽郡漢

太傅王陵母彭城郡漢御史大夫張湯母萬年縣漢河尹嚴

延年母東海郡漢淳于緄縈濟南郡以上烈女一十四人並

令郡縣長官春秋二時擇日隄前致祭歷代帝王廟每

所差側近人不課戶四人有闕續填仍關戶部處分至

十二載七月二十八日有勅停廢九載十一月十六日

周武王漢高祖于京城內各置一廟并置官吏

至德二載八月道士李國貞奏皇室仙系修崇靈路請

於昭應縣南三十里山頂置天華上宮露臺天地婆父

三皇道君太古天皇中古伏羲媧皇等祠堂并置洒掃

宮戶一百人又於縣之南義扶谷故湫置祠堂並許之

昭應縣令梁鎮上疏其畧曰天地婆父祀典無文言甚

不經義無可取若陛下特與天地建祖宗之廟必上天

貽向背之責又夫湫者龍之窟也龍得水則神無水則

螻蟻之匹也故知水存則龍在水竭則龍亡今湫竭已

久龍安所在何必崇飾祠宇豐潔薦奠其三皇五帝則

兩京及所都之處已建宮觀祠廟時設齋醮饗祀其湫既竭不可更置祠堂又不當更為天地建立宗廟臣並請停其三皇道君天皇伏羲女媧等既先各有廟望於本祠依禮齋祭制曰可

永泰二年五月詔道州舜廟宜蠲近廟兩京充掃除

從刺

史元結所請也

大曆五年四月鄜坊節度使臧希讓上言坊州軒轅皇帝陵闕請置廟四時饗祭列于祀典詔從之元和十四年正月勅周文王武王祠宇在咸陽縣宜令

有司精加修飾

天祐二年六月十五日封楚三閭大夫屈原為昭靈侯舜帝二妃祠為懿節祠

龍池壇

開元二年閏二月詔令祠龍池六月四日右拾遺蔡孚獻龍池篇集王公卿士以下一百三十篇太常寺考其詞合音律者為龍池篇樂章共錄十首

紫微合姚元之右拾遺蔡孚太

府少卿沈佺期黃門侍郎盧懷慎殿中監姜皎吏部尚書崔日用紫微侍郎蘇頌黃門侍郎李義府工部侍郎姜晞兵部侍郎裴璠等更為樂章十六年詔置壇及祠堂每仲春將祭

則奏之十八年十二月二十九日有龍見于興慶池因祀而見也勅太常卿韋縉草祭儀縉奏曰臣謹按周禮以鬮辜祭四方百物祭法曰能出雲爲風雨者皆曰神龍者四靈之畜亦百物也能爲雲雨亦曰神也禮有公食大夫饗之文卽生曰食亦曰饗矣其饗之日合用仲春之月易曰震爲龍震者東方春用于時二月也饗之法請用二月有司筮日池傍設壇官致齋設籩豆如祭雨師之儀以龍致雨也其牲用少牢樂用鼓鐘奏姑洗歌南呂鄭元云風師雨師及小祀用此樂凡六變者三

變而致鱗物今享龍亦請三變舞用帔舞樽用散酒以一獻周禮曰凡祭羣小祀用之也詔從之

二十三年五月一日宗子請率月俸于興慶宮建龍池聖德頌以紀符命望令皇太子中書令張九齡禮部尚書李林甫充檢校使從之五日宗子請令寧王憲題額侍中裴耀卿充模勒使

至天寶二年五月五日又重建立殿中監褒信王璆撰文皇太

子書并題額

貞元六年六月復祭五龍壇元和十二年四月上以自春以來時雨未降正陽之月

可雩祀遂幸興慶宮堂祈雨忽有一白鷓鴣浮沉水際
羣類翼從左右咸異之俄而不見方悟龍神之變化遂
相率蹈舞稱慶後大雨果下

唐會要卷二十三

武成王廟

宋

王

溥

撰

開元十九年四月十八日兩京及天下諸州各置太公
廟一所以張良配享春秋取仲月上戊日祭諸州賓貢
武舉人准明經進士行鄉飲酒禮每出師命將辭訖發
日便就廟引辭仍簡取自古名將功成業著宏濟生民
准十哲例配享至乾元元年九月十二日太常少卿于
休烈奏秋享漢祖廟見傍無侍臣享太公廟有張良在

側伏以子房生于漢楚翊奉高祖坐籌帷幄定天下考其年代不接太公自古配食廟庭陪葬陵寢皆取當時佐命同受哀榮太公人臣不合以張良配享請移于漢祖廟勅旨依

上元元年閏四月十九日勅文定禍亂者必先于武德拯生靈者諒在于師貞昔周武創業克寧區夏惟師尚父實佐興王况德有可師義當禁暴稽諸古昔爰崇典禮其太公望可追封為武成王有司依文宣王置廟仍委中書門下擇古今名將准文宣王置亞聖及十哲等

享祭之典一同文宣王至建中三年閏正月二十五日禮儀使顏真卿奏武成王廟用樂臣伏以自太公封武成王追封之禮與諸侯王名位義同廟庭用樂合准諸侯之數今請每至釋奠奏明懸之樂勅旨宜付所司至七月十一日史館伏奏表今年五月十五日勅武成王廟配享人等宜令史館參詳定名聞奏者又准開元十九年四月勅宜揀取自古名將充十哲

漢太子少傅張良先以配享齊

大司馬田穰苴吳將軍孫武魏河西太守吳起燕昌國君樂毅秦武安君白起漢淮陰侯韓信蜀丞相諸葛亮尚書右僕射衛國公李靖司空英國公李勣

七十二弟子

齊將孫臏越相國范蠡趙將信平君

廉頗齊將管仲齊將安平君田單趙將馬服君趙奢大將軍武安君李牧秦將王翦漢相平陽侯曹參梁王彭越左丞相絳侯周勃太尉條侯周亞夫大司馬冠軍侯霍去病大將軍長平侯衛青後將軍營平侯趙充國前將軍李廣後漢太傅高密侯鄧禹大司馬廣平侯吳漢征西將軍夏陽侯馮異建威將軍好時侯耿弇執金吾寇恂左將軍膠東侯賈復伏波將軍新息侯馬援太尉新豐侯段熲魏太尉鄧艾征東將軍晉陽侯張遼太尉將里侯皇甫嵩蜀前將軍壽亭侯關雲長車騎將軍西州侯張飛吳南郡太守周瑜南郡太守孱陵侯呂蒙大司馬陸抗丞相陸遜晉征南將軍南郡太守羊祜鎮南將軍當陽侯杜預撫軍大將軍襄陽侯王濬太尉長沙公陶侃車騎將軍康樂侯謝元前秦丞相王猛前燕太宰慕容恪宋司空武陵侯檀道濟征虜將軍王鎮惡後魏太尉長孫嵩北齊右僕射燕郡公慕容紹宗右丞相成陽王斛律光梁太尉王僧辯周大冢宰宇文憲太傅燕國公子謹右僕射鄭國公韋孝寬陳司空南平公吳明徹隋尚書令趙國公楊素右武侯將軍宋國公賀若

弼上柱國新義公韓擒虎上柱國太平公史萬歲皇朝司空河間王孝恭右武侯將軍鄂國公尉遲敬德右武衛大將軍邢國公蘇定方禮部尚書聞喜縣公裴行儉夏官尚書王孝傑左武衛大將軍韓國公張仁亶兵部尚書中山郡公王峻兵部尚書代國公郭元振太尉臨淮王李光弼太尉汾陽王郭子儀

天寶六載正月勅鄉貢武舉人上省先令謁太公廟每拜大將及行師尅捷亦宜告捷

貞元二年二月刑部尚書知刪定禮儀關播奏上元中詔擇古今名將十人于武成王廟配饗如文宣王廟之儀伏以太公古稱大賢今其下置亞聖賢之有聖于義不安且孔門十哲皆是當時弟子今所擇名將年代不

同于義既乖于事又失臣請刪去名將配享之儀及十哲之稱從之四月詔武成王廟樂章並未奏撰宜令于邵等撰進四年八月十三日兵部侍郎李紆奏准開元十九年勅置廟以張良配享准式以太常卿少卿丞等充三獻官祝文云皇帝遣某官敢昭告于齊太公漢留侯至上元元年追贈爲武成王享祭之典一同文宣王有司因差太尉充獻兼進祝版親署臣以今月三日蒙差攝祭方觀廟儀伏以太公卽周之太師張良卽漢之少傅聖朝列于祀典已極褒崇載在祝祠必資折衷理

或過當神何敢歆今者屈禮至於尊施敬于臣佐每謂御署並稱昭告于上下之祭竊謂非宜一同文宣王恐未爲允臣以爲文宣王乖教百世宗師五常三綱非其訓不明有國有家非其制不立故孟軻稱自生民以來一人而已由是正素王之法加先聖之名樂用宮懸獻差太尉尊師崇道雅合正經且太公述作止于六韜勲業形于一代豈可擬其盛德均其殊禮哉前件祝文請自今更不進署其收昭告請改爲致祭其獻官請准式差太常卿以下詔令百寮集議聞奏兼大理卿于頔等

四十六人議同李紆尙書右司侍郎中巖浚等議曰謹按李紆所奏援引訓典比量禮度祝文輕重之殺獻官尊卑之節誠至當矣推而廣之抑未盡也夫人名徽號先聖所以褒前哲令德之人謂其言可以範圍其行可以施百世其業可以振千古苟未至也則不虛美其于周公兵權奇計之人耳當殷辛失德八百諸侯皆歸于周時惟鷹揚以爲佐命在周有大功矣于殷謂之何哉祀典不云乎法施於民則祀之如仲尼之祖述堯舜憲章文武刪詩書定禮樂使君君臣臣父父子子後王及

學者皆宗師之可謂法施于民矣貞觀中以其兵家者流始令礪溪立廟開元中漸著上戊釋奠之禮其于進寵不爲薄矣上元之際執事者苟以兵戎之急遂尊武成封王之號擬議于文宣王優劣萬殊不可以訓禮不云乎擬人必于其倫太公之于聖人非倫太史公以韓非與老子同傳民到于今非之高祖封韓信爲侯自恥去武成及王字依舊令爲齊太公廟人無間言矣享獻之事餘依李紆所奏刑部員外郎陸淳等六人議曰臣

聞統天下者禮法也救天下者權數也拯難者常以權變禮以數易法有國者則尚德而賤數尊禮而晦權何者禮法行則民安其分務于修身權數騁則人思變常務于苟得安其分理之源也思變常亂之本也故救一時之弊者事不可貽于將來垂萬世之法者道必不行于當代竊以武成王殷臣也見紂之暴不能諫而佐武王以傾之于周則社稷之臣矣于殷謂之何哉且夫尊其道者必師其人必尚其行使天下之人入是廟也登是堂也稽其人可以思見師其道所由致法則俾夫立

節死義之士安所指其心乎聖人所以尊堯舜賢夷齊不法桓文不贊伊呂先之以敬讓尊之以禮樂蓋謂此也使武成之名與文宣爲偶權數之略與道德齊衡恐非不刊之典也臣愚謂宜罷上元追封立廟之制依貞觀于禘溪置祠令有司以時享奠斯得禮之正也左領軍大將軍令狐建等二十四人議曰當今兵革未偃宜崇武教以尊古重忠烈以勸今欲有貶損恐非激勸之道也追尊王位以時祠之爲武教之主若不尊其禮則無以重其教也文武二教固同其立廢亦不可異況其

典禮之制已歷三聖今欲改之恐非其宜也至九月十六日有勅以上將軍以下充獻官餘依李紆所奏天祐二年八月十三日中書門下奏遷都以來武成王廟猶未置立今仍請改爲武成王選地建造其制度配享皆准故事從之

寒食拜掃

龍朔二年四月十五日詔如聞父母初亡臨喪嫁娶積習日久遂以爲常亦有送葬之時共爲歡飲遞相酬勸酣醉始歸或寒食上墓復爲歡樂坐對松檟曾無戚容

旣玷風猷並宜禁斷

開元二十年四月二十四日勅寒食上墓禮經無文近世相傳浸以成俗士庶有不合廟享何以用展孝思宜許上墓用拜掃禮于塋南門外奠祭撤饌訖泣辭食餘于他所不得作樂仍編入禮典永爲常式

二十九年正月十五日勅凡庶之中情禮多闕寒食上墓便爲燕樂者見任官與不考前資殿三年白身人決一頓

貞元四年正月詔比來常參官請假往東郊拜掃多曠

廢職事自今以後任遣子弟以申情禮

元和三年正月勅朝官寒食拜掃又要出城並任假內往來不須奏聽進止

長慶三年正月勅寒食掃墓著在令文比來妄有妨阻朕欲令羣下皆遂私誠自今以後文武百官有墓塋域在城外并京畿內者任往拜掃但假內往來不限日數有因此出城假開不到者委御史臺勾當仍自今以後內外官要覲親于外州及拜掃並任准令式年限請假太和三年正月勅文武常參官拜掃據令式五年一給

假宜本司准令式處分如登朝未經五年不在給假限八年八月勅釐革應緣私事並不許給公券令臣等商量惟寒食拜掃著在令式銜恩乘驛以表哀榮遽逢聖旨重頒新命其應緣私事及拜掃不出府界假內往來者並不在給券限庶存經制可久遵行從之

開成四年二月中書門下奏常參官寒食拜掃奉進止准往例給公券者臣等謹案舊制承前常參官應爲私事請假外州往來並給券牒

緣祀裁製

唐會要 卷三
舊儀每祭籩豆之數各異至顯慶二年始一例大祀籩豆各十二中祀每十小祀各八

舊儀注大祀中祀並前七日十日小祀並前五日筮日皆于太廟南門之外卜吉而行之其遇廢務日並不迴避

貞元十五年十二月一日太常卿齊抗等奏每年大中
小祀都七十祭其四立二分二至臘上辛吉亥等日蓋
爲氣節也其後寅後申後亥後丑等日蓋謂星次也伏
以氣行有時刻星位有次舍或定用日或定用辰不可

改移請依舊制其或有別禱祭卽是太卜署擇日並請
在四月六日勅廢務日不用遂爲故典舊儀注無日蝕
廢祭之文元年建丑月祠部奏曰來年建寅月一日祈
穀祀昊天上帝是月司天臺預奏其日太陽虧時禮儀
使于休烈奏曰臣謹按曾子問曰當祭而日食其祭也
如之何夫子曰按祭而已矣牲至未殺則廢漢初平四
年正月當祭南郊日蝕又行冠禮博士殷盈孫與八座
議以爲正月元日太陽虧而冠有裸獻之禮有金石之
樂是爲聞災不嚴肅見異不怵惕也望下太常別擇日

其二日祭太一准禮儀物同祠所既緣日蝕各守本司亦望同下太常更擇日制曰可

舊制每歲大中小祀凡七十九祭皆尅定日辰著于祀典其與本文相當則祭更不下日三十四祭准禮但言時月不定日辰太卜署至時擇日

正月一十二祭 上辛祈穀祀昊天上帝于圓丘祀前

二日祭高祖一室立春日祀青帝于東郊亥日享先農

于東郊立春後丑日祀風師于國城東北立春日祭東

岳天齊王東鎮東安公東海廣德王東瀆長源公以上准禮

令著定日薦獻太清宮享太廟祀九宮貴神于東郊以上至時卜日

二月十祭 上丁釋奠文宣王上戊釋奠武成王春分

祀朝日于東郊社日祭太社太稷以上准禮令著定日祭五龍壇

祭馬祖開冰井祭司寒之神祭東冰井西冰井享文敬

太子惠昭太子廟並同日以上至時卜日

四月十祭 立夏日祀赤帝于南郊立夏後申日記雨

師雷師于國城西南立夏日祀南岳司天王南鎮永興

公南海廣利王南瀆廣利公以上著定日期薦獻太清宮享太

廟雩祀昊天上帝于圓丘祀前二日告太宗一室以上至時

日

五月四祭夏至日祭皇地祇于方丘祭前二日祭太

宗一室以上著定日期祭先收享文敬太子惠昭太子廟以上至時

日

六月四祭季夏土王日記黃帝于南郊同日祭中霤

中岳中天王以上著定日期是日復祭廣德王

七月八祭立秋日祭白帝于西郊立秋後辰日記靈

星于國城西南立秋日祭西岳金天王西鎮成德公西

海廣潤王西瀆靈源公以上著定日期薦獻太清宮享太廟以上

至時
下日

八月八祭上丁釋奠文宣王上戊釋奠武成王秋分

祀夕月於西郊社日祭太社太稷以上著定日期祭馬祖享文

敬太子惠昭太子廟以上至時下日

九月二祭季秋大享明堂享前二日告憲宗一室以上

至時
下日

十月十祭祭立冬祀黑帝于北郊立冬後亥日記司中

司命司民司祿于國城西北立冬日祭北岳安天王北

鎮廣寧公北海廣澤王北瀆清源公以上著定日期薦獻太清

宮享太廟祭神州地祇于北郊祭前二日告高祖一室
以上至時卜日

十一月六祭 冬至日祀昊天上帝于圓丘祀前二日

告太祖一室 以上著定日期 貢舉人謁先師祭馬步享文敬太

子惠昭太子廟 以上至時卜日

十二月六祭 寅日蜡祭百神于南郊卯日祭太社太

稷辰日臘享太廟奏祥瑞 以上著定日期 季冬太清宮奏祥瑞

藏冰祭司寒東冰井西冰井並同日用 以上至時卜日

開元九年六月五日太常奏曰伏准唐禮祭五岳四瀆

皆稱嗣天子祝版皆進署竊以祀典五岳視三公四瀆
視諸侯則不合稱嗣天子及親署其祝文伏請稱皇帝
謹遣某官某敬致祭于岳瀆之神從之

二十三年正月七日勅承前所給明衣多於齋夕付物

既不先造徒有其名自今以後明衣絹布並祀前五日

先給村監祭使具點閱仍永為常式至大歷六年十一

月三日勅自今以後五品以上及監察御史太常博士

宜准式給明衣絹及浴巾餘准常例其布絹支左藏庫

青苗物充

其年正月二十日詔自今以後有大祭宜差丞相特進少保少傅尚書賓客御史大夫攝行事至天寶七載六月八日勅自今已後每差攝祭官宜令吏部採擇朝廷有德望者充

天寶五載五月專知祠祭使王璵奏諸色祭官等並寬縱日久不懼刑憲當祭之日或逢泥雨或值節序盡皆請假曾無形跡自今以後臣皆私自察訪實無事故安請假及不肅敬者錄名奏聞望加貶責應緣行事或稍後到小疎遺望請量事大小便牒所司奪其俸祿勅旨

從之九載十一月三日制曰春秋祭享用存昭敬祝史陳信必在正辭苟名位之或乖于上下而非便承前有事宗廟皆稱告享茲乃臨下之辭頗乖尊上之義靜言斯稱殊未爲允自今以後每親告享太清太微宮改爲朝獻有司行事爲薦享親巡陵改爲朝陵有司行事爲拜陵應緣諸事告宗廟者並改爲奏其郊天后土及諸祀祝文云敢昭告並改爲敢昭薦以爲告者臨下之制故也式從變禮庶表誠心宣示中外令知朕意其載四月二十九日制頃者每祀黃帝乃就南郊義實有乖禮

亦非便稽諸體式理固不然宜于皇城內西南就坤地
改置黃帝壇朕當親祀以昭誠敬仍令中書門下與禮
官等更深詳定聞奏至十一月三日詔禮神以玉奠取
其誠精潔表心溫潤合德自馮紹貞奏後有司用珉禮
所謂君子貴玉而賤珉不可用也況國家之富有萬方
之助祭豈于天地宗廟奠玉有虧自今以後禮神六器
宗廟奠玉並用真玉諸祀用珉如以玉難得大者寧小
具制度以取其真

寶應二年五月四日吏部尚書劉晏奏諸色祠祭委禮

儀使撰禮料爲常式祭前點檢察器及饌物明衣有不
在者所由量事料決其行事官若出齋宮及不到明衣
及料不得妄制曰可

上元元年四月勅文有司所立秘祝之法或移于歲或
移于人君人之心寧所忍也自今以後削去其法其中
祀下祀並雜祭禮等一切停其諸應合祭禮列于常典
所用祭料一依古制務從減省以副朕心至貞元元年
二月十七日太常卿崔縱奏立春後丑日祀風師立夏
後申日祀雨師立秋後辰日祀靈星立冬後亥日祀司

中司命司民司祿准上元元年制中祀小祀一切權停
至永泰二年有勅復風師雨師其靈星司中司命等壇
宜令所司准開元禮配享

大曆七年八月禮儀使楊綰奏祀官祀前一日從齋所
集于太常寺一時赴祭所如祭在皇城內者則不集制
從之仍永爲常式至十四年六月十八日大內皇城留
守張景所奏得御史臺牒景風安上等門每至祀祭日
緣祭官到尚書省授誓戒了赴朝准舊例合早開又准
監門式皇城門無文早開勅旨自今以後祠祭授誓戒

官其日既赴尚書省不須入朝貞元六年正月詔書官
有私喪公除者聽赴宗廟之祭初御史監察者關白禮
凡有總麻以上喪不得享薦于是吏部奏申明白令使
行之可守九月穆服既葬公除及聞哀喪滿者請許吉
服赴宗廟之祭其同官未葬雖公除者請依前禁使輕
重有倫以一王法從之

貞元八年七月將作監元巨當攝太尉薦祭享昭德皇
后廟以其私忌日不受誓戒爲御史劾奏令尚書省與
禮官法官集議于是尚書左丞相盧邁等奏曰謹按禮

記云大夫士將奉祭于公既視濯而父母死猶是奉祭也又按唐禮散齋有大功喪致齋有周親喪齋中疾病則還家不奉祭祀皆無忌日不受誓戒之文雖假寧令忌日有給假一日春秋之義不以家事辭王事今亘以假寧常式而廢攝祭新命酌其輕重誓戒則祀之義校其禮式忌日乃循常之制詳求典據事緣薦獻不宜以忌日爲辭由是亘坐罰

元和三年四月太常禮院上言太廟時享及告廟朔望薦食同日謹按禮經祭不欲數伏以太廟禘祫祭禮重

于時享准禮時享與禘祫同月卽其月但行禘祫不行時享蓋不欲煩是禮先重者今時享重於朔望薦食詳求禮情參酌輕重于時享之月其朔望薦食亦合便停若兩禮兼行卽祭恐煩黷伏請每至時享及臘享但行享禮其月朔望薦食請停餘月一准舊制如告廟日與朔望薦食日同伏請先行告廟禮然後薦食所冀疎數有節合于禮中從之

長慶二年十一月監祭使監察御史蘇景胤奏祠祭稱定出齋宮等舊例准廟參不到四品以上罰二千文五

品以上罰一千文伏緣所罰稍輕更請加罰詔曰郊廟之儀本于恭恪罰輕生慢須議稍加自今以後有臨祭出齋者宜罰一月俸仍委監祭使每具所罰官名銜聞奏

太和九年十一月兵部尚書判太常卿充禮儀詳定使王起請創造禮神九寶玉奏議曰邦國之禮祀爲大事拜璧之儀經有前規謹案周禮祀天地四方以蒼璧禮天黃琮禮地青瑋禮東方赤璋禮南方白琥禮西方元璜禮北方又云四珪有邸以祀天兩珪有邸以祀地主

璧以祀日月星辰凡此九品器皆禮神之玉也又云以禋祀祀昊天上帝鄭元云禋烟也爲玉幣祭訖燔之而升烟以報陽也今與開元禮儀同此則焚玉之驗也又周禮掌國之玉鎮大寶器若大祭既事而藏之此則收玉之證也梁代崔靈恩撰三禮義宗云凡祭天神各有二玉一以禮神一則燔之禮神者訖事却收祀神者與牲俱燎則靈恩之義合於禮經今國家郊天報地祀神之玉常用守經據古禮神之玉則無臣等請下有司精求良玉創造蒼璧黃琮等九器祭訖則藏之其餘燎玉

則依常式從之

牲牢

武德元年十一月九日詔祭祀之本皆以爲民窮民事神有乖正直殺牛不如禴祭明德卽是馨香望古推今民神一揆其祭圓丘方澤宗廟以外並可止用少牢舊用者宜用特牲待時和年豐然後克修常禮

開元二十二年正月一日勅自古聖帝明王岳瀆海鎮祭用牲牢餘並以酒脯充奠

天寶三載閏二月勅祭必奉牲禮有歸胙將興施惠之教以廣神明之福比來胙肉所進頗多自茲以後卽宜少進仍分賜祭官及應入衙常參官廚共食

六載正月勅文祭祀之典犧牲所備將有達于虔誠蓋不資于廣殺自今以後每大祭祀應用騂犢宜令所司量減其數仍永爲常式其年起請天地合祭四時各用二犢五帝迎氣各用一犢冬至圓丘用一犢夏至方澤用一犢九宮貴神四時祭每祭各用一犢神州用一犢太廟五享每用一犢東京准上文宣王三祭每祭各用一犢東京三祭五岳每載一祭各用一犢右據舊料每

載用犢五百一十四頭今請減一百六十五頭既用三十九頭餘祠享並請停用犢至上元二年九月二十二日勅文國之大事郊祀爲先貴其至誠不美多品黍稷雖設猶或非馨牲牢空多未爲能享圓丘方澤任依舊式宗廟諸祠但臨時獻熟用懷明德之馨庶合西鄰之祭其年起請昊天上帝太廟各太牢一羊豕各三餘宮隨事而供

太廟羊豕
舊各九頭

大曆六年十一月三日勅五方上帝九宮並大祠朝日夕月百神大社先農釋奠並中祠自今以後太社用犢

中祠用猪羊各一委所司支給送太常入滌其副准前貞元十八年五月太僕奏每年四季送太常入滌羊犢送後或稱暴死准式埋訖真偽難明伏以毛色羊犢甚難擇採如有病死者望還太僕卿准數送替庶易辯明永爲常式制曰可

忌日

貞觀十九年太宗親征高麗以五月五日行以遼陽旣屬高祖忌日八座奏言臣等謹按禮云君子有終身之憂而無一朝之樂此所謂星迴歲改親沒同辰思其居

處不爲樂事今陛下親御六軍已登寇境庶務繁擁伏待剖決可以尊先聖之常經略近代之公議望請所有軍機要切百司依式聞奏手詔答曰今旣戎旅大事不可失在機速所以仰順古風俯從今請

神功元年七月清邊道大總管建安王攸宜破契丹凱還欲以是日詣闕獻俘內史王及善以爲軍將入城例有軍樂今旣國家忌月請備而不奏鳳閣侍郎王方慶奏曰臣按禮經但有忌日而無忌月晉穆帝納后用九月其月是康帝忌月于時疑不定下太常禮官荀訥議

稱禮只有忌日無忌月若有忌月卽有忌時忌歲益無禮據當時從訥所議軍樂是軍容與常樂不等臣謂振作于事無嫌

貞元五年八月勅天下諸上州並宜國忌日准式行香十二年五月詔先聖忌辰纔經叙慰戚里之內固在肅恭而乃遽從燕遊飲酒作樂旣乖禮法須有所懲前邠州長史郭煦宜于袁州安置前南郭縣尉郭暄于柳州安置曹自慶配流冰州其駙馬郭曖王仕平仍令勒歸私第先是初經代宗忌辰駙馬諸親悉詣銀臺奉慰及

唐會要 卷三十三
迴王仕平遂邀駙馬郭曖張昭賢張怙及曖女壻嗣許
王昭曖堂弟煦暉用教坊音聲入曹自慶並於宅中歡
樂上怒之固有此詔尋亦許曖及仕平出入

永貞元年十二月中書門下奏昭成皇后竇氏按國史
長壽二年正月二日崩其時緣則天臨御用十一月建
子爲歲首至中宗復舊用夏正卽正月行香廢務日須
改正以十一月二日爲忌

元和九年正月修撰官太學博士韋公肅上疏曰往禮
無忌月禁樂今太常及教坊以正月是國家忌月停習

郊廟享宴之音中外士庶咸罷慶樂伏尋經典切恐乖
宜臣謹按禮記有忌日不樂無忌月之文漢魏以降世
襲斯旨惟晉穆帝將納后以康帝忌月下議禮官荀訥
主洽曹軌王彪之並當時知禮者皆稱禮有忌日無忌
月若有忌月卽有忌時忌歲益無禮據時從其議伏以
仍前所禁皆在二十五月之中今旣世遠禮須改革臣
又聞統人立法必守先王之常經企及俯就不違聖哲
之明訓下盡羣言上留元鑒不以私懷而踰于禮節又
記曰禫月從樂明王制禮漸去其情不應以追遠而立

禮反重也今太常停習郊廟之樂是反重而慢神有可
禁中外之音是無故而去樂詳其前典情禮不倫考其
沿襲又無所據倘陛下正因循之越度法經典之明文
約禮之儀傳於史冊天下幸甚詔付中書門下令召太
常卿與禮官學官等詳議可否中書門下奏曰忌日太
常寺及教坊悉停閱習中外士庶亦皆禁斷准禮文及
歷代典故並無忌月禁樂請依常教習者勅旨宜依其
士庶之家亦宜准此

太和七年三月勅准令國忌日惟禁飲酒舉樂至于科

罰人吏部無明文但緣其日不合釐務官曹卽不得決

斷刑獄大小笞責在禮律固無所妨起今後縱有此類

臺府更不要舉奏

均王傳王堪男損國忌日於私第決責從人爲御史臺所奏遂下此勅

十五年五月太常禮院奏睿宗神主祧遷其六月二十
日忌并昭成皇后十二月二日忌准禮合廢從之

開成四年五月太常寺奏今月二十二日祀先農于東
郊其日與穆宗皇帝忌日同太和七年十二月八日季
冬蜡祭百神與敬宗皇帝忌日同准其年十二月六日
勅近廟忌辰奏樂非便冬季蜡祭又不可移變禮從宜

古有明據宜令其日懸而不樂庶叶典經今月二十二日祀先農欲准先勅懸而不樂從之

其年十月戶部侍郎崔蠡奏臣伏以國忌行香事不師古聖心求治動法典章臣頃于延英奏陳願有釐革陛下令史官尋討起置無文昨日閣中再承顧問雖因循未變亦無損于盛朝而除去不經冀流芳于異日勅旨朕以郊廟之禮奉在祖宗備物盡誠庶幾昭格恭惟忌日之感所謂終身之憂而近代以來歸依釋老徵二教而設食會百辟以行香將以仰奉聖靈冥資福祐有異

皇王之術頗乖教義之宗昨因崔蠡奏論遂遣討尋本未經文令式曾不該載世俗因循雅重釐革其京城及天下州府國忌日寺觀設齋行香起自今以後並宜停其月御史臺奏請國忌日天下依舊不舉樂不視事不鞭笞伏以道釋二教澶漫虛無陛下靡所歸依誠契至理但以列聖忌日行香及茲修崇示八廣孝兼以天下州縣不舉樂不視事不鞭笞以此海內蒼生常知列聖廟號今既停罷行香之後勅內又無其日徹樂廢公止行如舊之文伏恐遐遠之地迷其所向便與居常之日

率皆無殊臣思此事終關聖慮禮曰君子有終身之憂而無一朝之患故忌日不樂謂不舉吉事也伏願陛下聖睿留想若以設齋資福事損不經起今罷之已有詔旨其曰天下州縣不舉音樂不視公事不行鞭笞伏請重下明制依前遵守則凡在遐陬逮于蠻貊不忘廟號有裨孝禮之源勅旨設齋行香近已釐革過密停務自有典常臺司舉奏意在詳密宜依至宣宗卽位之初先以列聖忌辰行香既久合申冥助用展孝思其京城及天下州府諸寺觀國忌行香一切仍舊

天祐二年八月八日太常禮院奏今月十三日昭宗皇帝忌其日百官閣門奏慰後赴寺行香請爲永式從之

諱

武德九年六月太宗居春宮總萬幾下令曰依禮二名義不偏諱尼父達聖非無前旨近代以來曲爲節制兩字兼避廢闕已多率意而行有違經誥今其官號人名及公私文籍有世及民兩字不連續者並不須避

永徽二年十月七日尚書左僕射于志寧奏言依禮舍故而諱新故謂親盡之祖今皇祖宏農府君神主當遷

請依禮不諱從之

顯慶五年正月一日詔孔宣設教正名爲首戴聖貽範
嫌名不諱比見抄寫古典至于朕名或缺其點畫或隨
便改換恐六籍雅言會意多爽九流通義指事全違誠
非立書之本自今以後繕寫舊典文字並宜使成不須
隨義改易

景雲元年賈曾除中書舍人固辭以父名忠同音議者
以爲中書是曹司名又與曾父音同字别于禮無嫌曾
乃就職

永貞元年十二月改淳州爲睦州還淳縣爲清溪縣橫
州淳風縣爲從化縣淳于姓改爲于以音與憲宗名同
也論者以古不諱嫌名若禹與雨驅與區臨文不諱若
文王名昌武王名發周詩曰克昌厥後又曰一之日虜
發魯莊公名同春秋曰同盟于幽宣公名午書曰陳侯
午卒之類是也今古時變故廣避焉初憲宗爲廣陵王
順宗詔下將冊爲皇太子數日兵部尚書王詔上陳請
改名紹本名與憲宗諱同時君子非之曰皇太子亦人
臣也東宮之臣當請改耳奈何非其屬而遽請改名以

唐會要 卷三十一
避東宮豈爲禮事上耶左司員外郎李蕃曰歷代故事皆因無經學之臣而失之卒不可復正多此類是時韋貫之爲監察御史名與東宮同獨不請改旣而下詔以陸淳爲給事中改名質充皇太子侍讀貫之不得已乃上疏改其名大臣溺于風俗以爲細事而不正之非故事也

開成元年十一月中書舍人崔龜從奏前婺王府參軍宋昂與御名同十年不改昨日參選追驗正身改更稍遲殊戾勅旨宜殿兩選

會昌六年四月二十日勅中外官寮有名與御名同者及文字點畫相似今後卽任奏改音韻文字點畫不同不在奏改之限

咸通十二年七月侍御史李谿以奏狀內字與廟諱音同罰一季俸復執奏曰臣按禮記不諱嫌名又職制律諸犯廟諱嫌名不坐注云若禹與雨謂聲則同而字則異也今若受罰是違典例乃免之

天祐元年二月二十九日中書門下奏太常寺止鼓兩字敬字上犯御名請改曰肇從之

唐會要卷二十四

受朝賀

宋

王

溥

撰

舊制元日大陳設

皇太子獻壽次上公獻壽次中書令奏諸州表黃門侍郎奏祥瑞戶部尚

書奏諸州貢獻禮部尚書奏諸蕃貢獻太史奏雲物侍中奏禮畢然後中書令又與供奉官獻壽時殿上皆呼

萬歲按舊儀闕供奉官獻壽禮但依位次立禮畢竟無拜賀開元二十五年李林甫革其舊儀奏而行之冬至

然亦

貞觀十三年十月三日尚書左僕射房元齡奏天下太

平萬幾事簡請三日一臨朝詔許之至二十三年九月

唐會要 卷三十一
十一日太尉無忌等奏請視朝坐日土報曰朕幼登大位日夕孜孜猶恐擁滯衆務自今以後每日常坐其後至永徽二年八月二十九日下詔來月一日太極殿受朝此後每五日一度太極殿視事朔望朝卽永爲常式顯慶二年二月太尉長孫無忌等奏以天下無虞請隔日視事許之

聖歷二年正月制朝官有期喪大功未葬不得朝賀神龍元年二月朝則天皇帝於上陽宮因勅每十日一朝左臺侍御史盧懷慎上表曰臣聞昔漢祖受命五日一

朝太公於櫟陽宮今日陛下豈不欲爲此乎臣度其事業與此有異夫漢祖起布衣登皇極子有天下尊歸於父故行於此耳今陛下守文繼統嗣武開基奉三聖之休烈當千齡之寶命順天立極蓋曰其常不知何爲更用此道遠自三五洎乎夏殷聖帝明王臣所覽見未有用此者陛下安所取則哉臣聞事不師古匪說攸聞禮煩則瀆抑有其義况應天去提象纜至二里餘騎不得成列車不得方軌於茲屢出假令愚人萬一有犯屬車之塵者陛下雖罪之何及縱使萬全亦非重慎之道也

臣望陛下從今以後遵其內朝一則有暢於清溫二則無煩於出入敬慎之道誰曰不然必以長至在辰元正布歷應天納祐行慶有期則願陛下備法駕周羽儀然後出朝亦示天下大禮也居常之日竊願陛下思之其年四月二十七日上以時屬炎暑制令每隔日不坐右拾遺靳恒上疏諫曰臣聞昔漢制反支日亦通奏事又光武在軍躬自覽疏明帝撫運夜必讀書豈以四氣炎寒妨于政治况陛下紹登大位初啓中興六合之內莫不延首傾聽威恩未著忠信未孚勤勞者未達寃滯者

未舉逋逃者未還浮僞者未息兼之國用凋敝倉廩空虛獄訟猶繁澆淳尚雜外逼兇寇調發未寧內切饑寒衣食不足人思陛下企望太平久矣陛下固宜兢兢業業居安慮危絕嗜慾之源從清靜之化宵衣旰食以蒼蒼生之望簡賢任能以救蒼生之弊使天下翕然一變化俗奈何以其微熱遂闕一日萬幾之事六合之內家到戶說必謂陛下安其宮室重其晏閑忽於黎庶怠於聽政復何以達堯心於天下復何以垂令範於後世臣愚竊爲陛下有所嘆息

開元八年九月初正冬朝會宴見蕃國王臨軒設樂懸
陳車輅備麾仗其朝日受朝儀注減半其年十一月十
三日中書門下奏曰伏以十四日冬至一陽初生萬物
潛動所以自古聖帝明王皆以此日朝萬國觀雲物禮
之大者莫逾是時其日亦祀圜丘令攝官行事質明既
畢日出視朝國家以來更無改易緣新修條格將畢其
日祀圜丘遂改用立冬日受朝若親拜南郊受賀須改
旣令攝祭理不可移伏請改正從之因勅自今以後冬
至日受朝永爲常式至天寶二年十一月五日甲子冬

至勅伏以昊天上帝義在尊嚴恭惟祭典每用冬至旣
于是日有事圜丘更受朝賀實深兢惕自今以後冬至
宜取以次日受朝仍永爲常式至永泰元年十一月三
日詔以十三日甲子冬至令有司祭南郊後於含元殿
受朝賀至建中二年十一月二十日勅宜以冬至日受

朝賀

天寶六載十二月二十七日勅中書門下奏承前諸道
差使賀正十二月早到或有先見或有不見其所賀正
表但送省司又不通進因循日久於禮全乖望自今以

後應賀正使並取元日隨京官例序立便見通事舍人
奏知其表直送四方館元日伏下候一時同進勅旨依
大曆九年十一月八日勅故源王發引遷神廢冬至朝
賀十四年十一月三十日勅元日門下侍郎奏祥瑞宜
停至貞元四年十一月十三日中書侍郎李泌奏冬至
朝賀請准元日中書令讀諸方表勅旨宜依

建中元年十一月朔御宣政殿朝集使及貢士見自兵
興以來典禮廢墜州郡不上計內外不會同者二十五
年至此始復舊典州府計吏至者一百七十有三二年正月朔御含元

殿四方貢獻列爲庭實復舊例也

貞元七年四月二十八日勅昔者聖賢仰觀法象因天
地交會之序爲父子相見之儀泐襲成風古今不易王
者制事在於因人酌其情而用中順其俗而爲禮咸覲
之儀旣行父子之間資事之情豈隔君臣之際由恩卿
士自我爲初自今以後每年五月一日御宣政殿與文
武百寮相見京官九品以上外官因朝參在京者并聽

就列宜令所司卽量定儀注頒示仍永編禮式

本以五月一日

陰生臣子道長君父道衰非善月也因創是日朝見之儀初欲冕服御宣政殿屬塗潦乃以常服御紫宸殿

至元和三年四月詔五月一日御宣政殿受朝賀禮儀

停

先是創有此禮自後亦不多行至是上以術數之說禮經不載遂罷之

九年正月朔上

御紫宸殿受朝賀賦朝退觀仗歸營詩十一年十一月日南至不受朝賀以司徒馬燧出葬故也

會昌二年四月中書門下奏元日御含元殿百官就列惟宰相及兩省官皆未索扇前立于檻欄之內及扇開便侍立于御前三朝大慶萬拜稱賀准宰相侍臣同介胄武夫竟不拜至尊而退酌于禮意似未得中臣等商量請御殿日昧爽宰相兩省官對班于香案前俟扇開

通事贊兩省官再拜訖遂升殿侍立從之

咸通四年五月朔宴迴鶻於上清殿非常例也

諸侯入朝

貞觀元年十一月梁州都督竇軌請入朝上曰君臣共事情猶父子外官久不入朝情或疑懼朕亦須數見之問以人間風俗許令入朝至十五年正月上謂侍臣曰古者諸侯入朝有湯沐邑芻禾百車待以客禮漢家故事為諸州刺史郡守創立即舍於京城頃聞都督刺史充考使至京師皆賃房與商人雜居既復禮之不足必

唐會要 卷三十一
是人多怨嘆至十七年十月一日下詔令就京城內閑坊爲諸州朝集使造邸第三百餘所上親觀焉至永淳元年關中饑乏諸州邸舍漸漸殘毀至神龍元年司農卿趙履溫希權要奏請出賣並盡至建中元年十月二十九日勅每州邸第令本州量事依舊營置至二年五月十四日戶部奏若令州府自置事又煩費伏請以官宅二十所分配共給諸州朝集使勅旨宜依二十年有司上言按漢儀注朝賀正月常一王四侯十餘載一至又按史記諸侯王朝凡四見留長安不過二十日今諸

王入朝者甚多非其示之簡要宏之禮節旣乖古制有虧前典臣請每歲二王入朝禮畢還藩敢以義請從之顯慶二年十二月勅諸都護刺史入朝日及新授未辭因便在京朝會一事以上並同京官

先天二年十月勅諸蕃使都府管羈縻州其數極廣每州遣使朝集頗成勞擾應須朝賀委當蕃都督與上佐及管內刺史自相通融明爲次第每年一蕃令一人入朝給左右不得過二人仍各分頒諸州貢物于都府點檢一時錄奏

開元八年十月勅諸督刺史上佐每年分蕃朝集限十月二十五日到京十一月一日見其年十一月十二日勅諸州朝集使長官上佐分蕃入計如次到有故判司代行未經考者不在禁限其員外同正員次正官後集十四年二月勅嶺南五府管內郡武安萬安等三十二州不在朝集之限其承前貢物者並附都府貢進十八年十一月勅靈勝涼相代黔駕豐洮朔蔚媯檀安東疊廓蘭鄯甘肅瓜沙嵐鹽翼戎慎威西牢當郎茂驩安北庭單于會河岷扶拓安西靜悉姚雅播容燕順忻平靈

臨薊等五十九州爲邊州揚益幽潞荆秦夏汴澧廣桂安十二州爲要州都督刺史並不在朝集之例

二十二年十一月勅諸朝集使十日一參朔望依常式應須設食等准例處分

永泰元年正月宰臣王緒等奏春秋之義臣子一例今後有大臣入朝百寮望請朝罷于中書行相見之禮其宴餞准故事于鴻臚亭集從之

時上優寵大臣入觀之日建百官朝罷行相見

大曆十四年六月勅諸州刺史入計如式

建中二年七月二十二日勅諸州府今年朝集使宜且
權停其貢物及文解等准例令考典赴上都

貞元十三年徐州節度使張建封來朝及命歸鎮上御

製詩以賜之

牧守其所重才賢生為時宣風自淮甸授
鉞膺藩維入覲展還戀臨軒慰來思忠誠

在方寸感激陳情辭報國爾所尚恤人余是資歡宴不
盡懷車馬當還期穀雨將應候行春猶未遲勿以千里
遙而云又命中使齋所執鞭以賜之曰以卿大節歲寒
無己知

不移故賜此鞭以表之又十七年閏正月夏州節度使

右僕射韓全義來朝自入覲及歸不見不辭于正朝

時全

義自夏州節度使為蔡州招討及赦吳
少誠全義至闕不見不辭于正朝也

元和十四年八月魏博節度使田宏正來朝賜宴于麟
德殿其大將三百餘人賜物有差

十五年二月勅淄青統押海蕃每年皆有朝事比差部
領人數校多今後差官正試相兼不得過五人

長慶四年勅節度觀察使入朝不得別有進獻

會昌元年六月勅東道節度使鄭復雖稱有疾擅離本

道宜釋放以後藩鎮如更違越必舉憲章

大中五年正月勅自今以後諸道節度防禦經畧等使

有請覲者但先獻表章請得詔旨許允即任進發務使

行止之際臨時不失事機

二王三恪

武德元年五月二十二日詔曰革命創業禮樂變于三王修廢繼絕德澤隆于二代是以鳴條克蜀杞用夏郊牧野降休宋承殷祀爰及魏晉禪代相仍山陽賜號于當塗陳留受封于典午上天迴睠授朕躬隋氏順時遜其寶位敬承休命敢不對揚永作我賓宜開土宇其以莒之鄆邑奉隋帝爲鄆公行隋正朔車旗服色一依舊章仍立周後介國公共爲二王後至二年五月鄆公

薨追崇爲隋帝諡曰恭

貞觀二年八月制曰二王之後禮數宜崇寢廟不修廩

餼多闕非所以追崇先代式敬國賓可令所司量置國

官營立廟宇

永昌元年十一月一日制以周漢之後爲二王仍封舜

禹成湯之裔爲三恪至神龍元年五月十日制宜依舊

以周隋爲二王後

開元三年二月勅二王後每年四時享廟牲及祭服祭器並官給及帷幄几案有闕亦官給主客司四時省問

子孫准同正三品蔭隋後每年給絹三百疋米粟三百石周後每年賜絹二百疋粟三百石並春秋支給仍准見承襲人親兄爲分襲者與三分餘各一分兄弟有得職事官者其物卽還見襲人十五年閏九月勅二王後爲賓者會賜同京官正三品其夫人亦同諸王公以下無子孫以兄弟爲會曾經侍養者聽承襲贈爵者亦准此若死王事雖不曾經侍養亦聽承襲又二王後犯罪當除爵者改立次賢禮曰二王之終斷禮宜崇其本天寶七載五月十三日制自古帝王建邦受命必敬先

代周備禮文旣存三恪之位漢從損益惟立二王之後自茲以降且復因循將廣繼絕之恩式宏復古之道宜于後魏子孫中擇揀灼然相承者一人封爲韓公准鄒介公例立爲三恪

九載六月六日處士崔昌上封事以國家合承周漢其周隋不合爲二王後請廢詔下尚書省集公卿議昌負獨見之明羣議不能屈會集賢院學士衛包抗表陳論議之夜四星聚于尾宿天象昭然上心遂定乃求殷周漢後爲三恪廢韓介鄒等公以昌爲贊善大夫包爲虞

部員外郎至十二年五月九日魏周隋依舊爲三恪及二王後復封韓介鄴等公其周漢魏晉齊梁帝王廟依舊祭六月九日崔昌衛包等皆貶官太和五年正月鄴國公楊元濬奏臣先祖隋文帝等陵四所在鳳翔一所揚州兩所京兆府一所准去年四月九日勅二王後介國公先祖陵例每陵每月合給看守丁三人鳳翔府已蒙給丁訖其京兆府及揚州未蒙准勅例給勅旨各令州府准元勅處分

開成五年十月勅介公宇文士元亡宜輟今月五日朝參便爲常式
會昌三年八月中書門下奏二王後爲國賓又是一品前年方輟朝請編入令式從之

朔望朝參

常朝日附

貞觀二十二年十月八日令百寮朔望日服袴褶以朝永徽元年十月五日京官文武五品依舊五日一參神龍元年四月十四日初令文武官五品以上每朔望參日升殿食

先天二年十月勅文武官朝參着袴褶珂繖者其有不

著入班者各奪一月俸若無故不到者奪一季祿其行香拜表不到亦准此頻犯者量事貶降其衣冠珂繖乃許着到曹司

開元中蕭嵩奏每月朔望皇帝受朝於宣政殿先列仗衛及文武四品以下于庭侍中進外辦上乃步自序西門出升御座朝罷又自御座起步入東序門然後放仗散臣以爲宸儀肅穆升降俯仰衆人不合得而見之乃請備羽扇于殿兩廂上將出所司承旨索扇扇合上座定乃去扇給事中奏無事將退又索扇如初令以常式

開元二十五年御史大夫李通奏每至冬至及緣大禮應朝叅官并六品清官並服朱衣餘六品以下許通著袴褶如有褻故准式不合著朱衣袴褶者其日聽不入朝自餘應合著而不著者請奪一月俸以懲不恪制曰可

天寶三載二月三十日勅百官朔望朝叅應服袴褶并著珂繖至閏二月一日宜停自今以後每逢此閏仍永爲常式

六載九月二十一日勅自今以後每朔望朝晚于常儀

一刻進外辦每座喚仗令朝官從容至閣門入至障外
不須趨走百司無事至午後放歸無爲守成宜知朕意
至十二載十一月十三日御史中丞吉溫奏請京官朔
望朝叅著朱衣袴褶五品以上著珂繖制曰可十三載
九月御史中丞吉溫奏朔望朝叅望自今以後除仗衛
官外餘官不到兩人以上者及本司官長各奪一季祿
五人以上者奏聽處分至冬應合著袴褶并珂繖若不
具者請准勅彈奏從之
十四載三月一日勅常叅官分日入朝尋勝宴樂

乾元三年四月十五日勅員外郎五品以上常叅官自

今以後非朔望日許不入賊平之後依舊常叅

時安史據河洛

故也

廣德二年九月一日勅朝官遇泥雨准儀制令停朝叅
軍國事殷若准式停恐有廢闕泥既深阻許延三刻傳
點待道路通依常式以後亦宜准此

大厯七年六月御史大夫李栖筠奏伏以朝廷之儀義
當祇肅今者以手力資錢比俸祿舊罰請准永泰元年
八月勅爲定其一司之中有三人以上是叅官其日並

不到者本司長官請罰一月手力資錢其一月內三度不到者雖每度有罰亦准前罰一月資錢每月仍便於左藏庫折納其有久不朝謁并假過百日以上者望令本司錄奏如相容隱臺司訪察彈奏餘請依後勅處分從之又文武常叅官或有晚入并全不到及班列失儀委御史臺錄名牒所由奪一月俸經三度以上者彈奏准開元二十二年正月勅如聞朝官仗下多到門及中書門下不散自今以後宜令臺司糾察除公事見宰相一切從正門出違者彈奏又准乾元元年勅朝叅官無

故不到奪一月俸

貞元二年八月一日御史中丞竇叅奏准儀制令泥雨合停朝叅伏以軍國事殷恐有廢闕請令每司長官一人入朝有兩員并副貳亦許分日其夜甚雨至明不止許令仗下後到外廊食訖入中書其餘官及王府長官並請停朝任於本司勾當公事泥雨經旬亦望准此七年十一月詔常叅官人閣不得奔走其有周以下喪者禁祿服朝會服衣綾袍金玉帶初金吾將軍沈房有弟喪公服不衣祿服入門上問宰臣董晉對曰准式朝

官有周以下喪者許服絕縵衣不合淺色上曰南班何得有之對曰因循而然又曰在式朝官皆以綾爲袍五品以上服金玉帶取其文綵華飾以奉上也昔尚書郎含香此意也

八年十月復命金吾置門籍

十二年四月御史中丞王顏奏吏部兵部禮部侍郎郎中員外郎共一十二員起去年十一月一日至今年三月三十日並不朝臣比謂選限內不朝實憑格勅去三月二十一日輟朝前件官並闕奉慰臣刺中書門下省

并兵部吏部檢勅格無文伏以國朝故事開元以前旬假節日百官盡入朝至天寶五載始放旬節假日不入近年又賜分日伏緣優貸之厚有改慢易之愆詔自今以後吏部兵部尚書侍郎除試人詮注唱官并禮部侍郎兵部南曹官試人及入宿日其餘朝叅等官並准式尋爲吏部兵部禮部奏舉詔又可之

十三年正月御史臺奏諸司常叅文官隔假三月以上並橫行叅假其武班每月先配九叅比來或經冬至及歲寒食等三節假滿不足本配入日並不橫行事實乖

闕請從自今以後每經三節假滿縱不是本配入日亦請依文官例叅從之其年六月十二日勅卿等朝謁是常或陰雨不聞鼓聲則不免奔波走馬忽有墜損深軫朕懷自今以後縱鼓聲差池亦不得走馬及時暑稍甚雨雪泥潦亦量放朝叅

十五年四月膳部郎中歸崇敬以百官朔望朝服袴褶非古禮上疏曰按三代典禮兩漢史籍並無袴褶之制亦未詳所起之由隋代以來始有服者事不師古請罷之奏可

元和元年三月准吏部兵部尚書侍郎郎官并禮部侍郎御史中丞武元衡奏前件等司近起十月至來年三月稱在選舉限內不奉朝叅令式無文禮敬斯闕一年之內半歲不朝准貞元十二年中丞王顏奉勅釐革載在明文尋又因循輒自更改若以兵部禮部選舉限內事繁卽中書門下御史臺度支京兆府公事至重朝請如常而况旬節已賜歸休常叅又許分日一月之內纔奉十日朝叅其間甚熱甚寒皆蒙頒放臣以爲王顏舉奏甚詳當時勅文處分甚備請准貞元十一年四月勅

旨自今以後永爲常式他年妄改前條請委臺司彈奏庶使班行式序典法無虧依奏

二年十二月御史臺奏文武常參官准乾元元年三月勅如有朝堂相弔慰及跪拜待漏行立不序談笑喧譁入衙門執笏不端行立遲慢至班列不正趨拜失儀言語微喧穿班仗出閣門不卽就班無故離位廊下食行坐失儀語鬧入朝及退朝不從正衙出入非公事入中書每犯奪一月俸今商量舊條每罰各減一半有犯必舉不敢寬容如所由指揮尚抵拒非卽請准舊例錄奏

貶官從之

四年十月御史中丞李夷簡奏准貞元十二年四月中丞王顏元和元年三月中丞武元衡奏兵部吏部禮部侍郎官每年舉選限內不奉朝參又今年所造選格不詳勅文復請明日朝參臣合彈奏勅宜准貞元十二年四月勅處分

九年十二月勅起來年正月以後每朔望日刑部侍郎郎中員外大理卿少卿及中丞一人時對其日宰相并次對中朝官並不用來

十年三月壬申朔御延英殿召對宰臣故事朔望日御宣政殿見羣臣謂之大朝元宗始以朔望陵寢薦食不聽政其後遂以為常今之見宰臣時特以事召也其年六月勅御史臺自今以後常叅官每入班以見到人名銜進來其朔望及雙日勿進是月詔自今以後許寅後二刻傳點及是質明後朝騎有尚在街中者待坐紫宸殿久之而朝班未至因命宰臣宣諭之乃復

史以中丞裴度遇盜故也

時命宰臣戒九卿御

十四年二月詔朔望據錢多少每貫罰二十文仍委

御史臺糾察聞奏至大中四年十月望不視事比之大祠故也

太和元年六月勅文武常叅官朝叅不到御史中丞魏謨奏准兵部吏部禮部三司尚書侍郎等官一十三員主舉選試五箇月不朝叅近已降流聞奏訖奏勅前後勅文處分有司不合妄更奏論准貞元十二年元和四年彈奏前件三司除試人及入宿外並不朝叅勅文會未經年三司復此論奏今具前後勅文如前勅者本是五箇月不朝今許不過一兩月奏不權放必恐擁

唐會要 卷之...
滯准兵部選事勞逸尤與吏部不同選限內遇公事繁併日任具事由牒臺尋常不在放朝叅限

天祐二年十二月勅漢宣帝中興五日一聽朝歷代通規宜爲常式今後每月只許一五九日開延英計九度其入閣日仍于延英日一度指揮如有大段公事中書門下具膀子奏請開延英不拘日數
三年六月勅文武百僚每月一度入閣于貞觀殿貞觀大殿朝廷正衙正至之辰受羣臣朝賀比來視朔未正規儀今後于崇勳殿入閣

廊下食

貞觀四年十二月詔所司于外廊置食一頓出國朝故事正史檢

不獲

貞元二年九月舉故事置武班朝叅其廊下食等亦宜加給

然後除代至是先除尚書右丞李光素然後輟朝非也
十六年以徐泗濠等州節度使張建封卒輟朝近例節
度使帶僕射以上卒輟朝三日尚書以下都團練觀察
使則否洎貞元八年嗣曹王臯十一年李自良皆以節
度使帶尚書卒各輟朝三日至十四年樊澤以僕射卒
輟朝一日十五年黔府觀察使王礎卒時爲輟朝一日
元和九年六月丙子天德軍經畧使周懷義卒輟朝一
日經畧使廢朝自懷義始也

太和元年七月太常博士崔龜從奏大臣薨輟朝日伏
以廢朝軫悼義重君臣所貴及哀尤宜示信自頃以來
輟朝非奏報之時備禮於數日之外雖遵常制似不本
情臣不敢遠徵古書請引國朝故事貞觀中任瓌卒有
司對仗奏聞太宗責其乖禮岑文本旣歿其夕爲罷警
嚴張公謹之亡哭之不避辰日是知憫悼之意不宜過
時臣謂大臣薨禮合輟朝縱有疑務急速便殿須召宰
臣不臨正朝無爽事體如此則由衷之信載感於幽明
彌情之文無虧於禮典太常寺叅定上言曰伏以近日
文武三品以上官薨卒皆爲輟朝其間有未經親重之

官今任是列散者爲之變禮誠恐非宜自今以後文武三品以上非曾任將相及曾在密近宜加恩禮者餘請不在輟朝例其餘並請依元勅又中書門下奏覆古有當祭告喪義在申情同體過時而哭於理爲乖禮院所請合輟朝者各以聞喪之時明日請依餘約太常寺所奏別具品列輕重進定謹按儀制令百官正一品喪皇帝不視事一日又准官品令太師太傅太保太尉司徒司空以上正一品太子太師太子太傅太子太保以上從一品侍中中書令以上正二品左右僕射太子少師

太子少傅太子少保三京牧大都護上將軍統將以上從二品門下中書侍郎六尚書左右散騎常侍太常宗正卿左右衛及金吾大將軍左右神策神武龍武羽林大將軍內侍監以上正三品御史大夫殿中秘書監七寺卿國子祭酒少府監將作監京兆河南尹以上從三品緣令式舊文三品以上薨歿通有輟朝之制伏以君臣之間禮情所及事必繁于委遇官則以時重輕一用舊儀咸乖中道臣等叅配色目如前其留守節度觀察都護防禦經畧等使並請各據所兼官爲例依奏其年

九月中書門下奉近奏定合輟朝官品勅已尋行其致仕官多是優禮合同貞觀勅例未該須有處分自今以後其致仕官如非曾任三品以上正官及歷四品清望並不在此例依奏勅應官至丞郎亡歿合有廢朝況班在諸司三品之上自今以後宜准諸司三品官例處分

因尚書左丞庾散休薨乃降是勅也

太和八年七月太僕卿段伯綸卒伯綸秀實之子自古歿身以利社稷無如秀實者文宗乃特加贈仍輟朝一日以禮忠臣之嗣

會昌三年八月中書門下奏親王公主墓日准德宗以前實錄並合輟朝一日請自今以後准故事處分又京官一品尚書省二品及時舊相方臻此位比來同刺史曾任監例輟朝一日恐輕重不倫起今後並望輟朝兩日又二王後爲國賓又是一品前年方與輟朝請編入令式又駙馬登朝之初例除四品既是國戚不合繫於品秩望輟朝一日並依奏

大中十一年右羽林統軍鄭光卒上之元舅也詔贈司徒輟朝三日御史大夫李景儉上疏曰鄭光是陛下親

舅外族之愛誠軫聖心今以輟朝之數比于親王公主
卽前例所無縱有似不可施用何者先王制禮所貴防
微大凡人情于外族則深于宗屬則薄先王制禮割愛
厚親據開元禮外祖父母親舅喪止服小功五月若親
伯叔親兄弟卽服齊縗周年所以疎其外而密于內也
有天下者尤不可使外戚強盛今鄭光輟朝日數望速
改詔命輟朝一日或兩日示其升降有差恩禮無僭垂
之百王永播芳烈疏奏乃詔罷朝兩日

雜錄

開元元年十二月勅諸文武官三品以上及中書黃門
侍郎若遇雨聽著雨衣及帽至殿門外并聽著出入又
諸文武三品以上帶職事者欲向田莊不出四面關者
不須辭見致仕朝朔望者準此

二年閏二月七日勅每受朝日平明後仗未下前皇城
內正南街宜斷人馬來往

十五年十月勅文諸道遙授官自非路便卽不須赴謝
天寶十三載七月勅自今以後應正衙引辭官當日不
發委御史臺察訪聞奏

貞元十三年六月詔自今以後時暑及雨雪泥潦亦量放朝叅

十五年正月丁亥不視事以公卿等朝拜諸陵故也初是月七日拜陵官發其日本視事適會董晉卒廢朝至十六年二月公卿拜陵發日遂不親視事迄今因循行之

元和元年三月御史中丞武元衡奏中書門下御史臺五品以上官尚書省四品以上官諸司正三品以上官及從三品職事官東都留守轉運鹽鐵節度觀察使團

練防禦招討經畧等使河南尹同華州刺史諸衛將軍三品以上官除授皆入閣謝其餘官許于宣政南班拜訖便退從之

三年六月百官初入待漏院候禁門啟入朝故事建福望仙等門昏而閉五更而啟與諸里門同時至德中有土蕃白金吾仗亡命因勅晚開宰相待漏太僕寺車坊至是始令有司各據班品置院於建福門

五年十二月義武軍節度使張茂昭舉族歸朝至京師故事雙日不坐是日特開延英

十四年八月上謂宰臣曰今天下雖漸平尤須勤於政
治若遇休假頻不坐朝有事卽詣延英請對勿拘常制
十五年正月十三日延英閣宰臣及羣官往對已而上
却不坐以中書侍郎令狐楚有事于太清宮故也其年
十月下元假召宰臣對于延英議邊事也
太和七年正月戶部侍郎庾敬休奏當司未有待漏院
今請於鹽鐵度支待漏院側創造依奏

九年八月御史臺奏應文武朝參官新除授及諸道節
度觀察經畧防禦等使及入朝赴鎮並合取初朝謝日
先就廊下參見臺官然後赴正衙辭謝或有於除官之
日及朝覲到城忽遇連假三日以上近例便許于宣政
門外見謝訖至假開亦須特到廊下參臺官者請自今
以後如遇連假已見謝訖至假開亦須特到廊下參臺
官依奏

開成元年正月勅自今以後每遇入閣日次對官未要
隨班並出並于東階松樹下立待宰臣奏事退令齊至
香案前各奏本司公事左右史待次對官奏事訖同出
其年五月中書門下奏自今以後除刺史並望延英對

了奏發日限促不遇坐日許于臺司通將待延英開日辭了進發從之

三年二月御史臺奏宣自今以後遇延英開擬中謝官委司臺立一日依官班具名列奏如先奏卽不在中謝限又勅新授方鎮延英開日便令中謝其兩省官中謝卽不在令本司前一日奏聞餘依其年二月堂帖奉宣漸授刺史於閣內及延英中謝不必須候延英開其月中書門下奏僕射尚書侍郎左右丞五監九寺大卿監准開成元年三月勅每遇延英開並令候對如入閣日

班退後各於紫宸殿前東西松樹下依位立本司有公事卽聞奏者伏以兩衙坐日宰臣及次對官奏事比及退朝已是辰巳之間若更祇候卽廢闕公務今日延英面論並請停罷如須顧問隔宿及臨時宣召必不稽遲依奏其年十月莊恪太子薨中書門下奏輟朝合至月未舊無起居之禮頗乖臣子之心臣等商量隔三日一赴延英進問起居應協情禮從之
四年正月中書門下奏尚書省四品以上官及諸卿監等遇兩衙坐日宜令兩人循環於閣內及延英祇候者

勅前件官等若當待制之日重差定憲慮妨公事起今以後合祇候官請不在待制之限依奏其年二月御史中丞高元裕奏伏以近日丞郎以上官未就食之前時有稱疾便請先出請自今合候對官遇延英開日有事要與宰臣商量者卽請拜食後先出仍事須前牒臺司或年齒衰遲不任每度就食者量許三度仗下後先出其餘官不在此限如違請每月終一度具名聞奏依奏

百官奏事

舊制六品以下官奏事皆自稱官號臣姓名然後陳事

通事舍人侍御史殿中侍御史則不稱官號

貞觀四年五月五日上謂房元齡等曰君子臣子情亦無別前如晦亡朕爲不視事數日惻愴之今任瓌亡豈有內外殊異所司不進狀乃對仗便奏此豈識朕意如朕子弟不幸死亡公等可如此奏耶今日後不得如此永徽二年十二月詔五品以上上封事不能進聽仗下面奏

景龍二年二月七日勅仗下奏事人宜對中書門下奏若有秘密未應揚露及太史官不在此限至三年二月

二十六日勅諸司欲奏大事並向前三日錄所奏狀一本先進令長官親押判官對仗面奏其御史彈事亦先進狀至開元五年九月十二日詔比來百司及詔使奏陳皆待仗下頗乖公道須有革正自今以後非灼然秘密不合彰露者並令對仗如文書浩大理文雜著仍先進狀其太史官自依舊例至六年七月二十八日詔曰百司及奏事皆合對仗公言比日以來多仗下獨奏宜申明舊制告語令知如緣曹司細務及有秘密不可對仗奏者聽仗下奏

開元十八年四月二十一日勅五品以上要官若緣兵馬要事須面奏陳聽其餘常務並令進狀

興元元年九月上謂宰臣曰近者朝官諫言都不陳奏時之利病何以知之自今每正衙及延英坐日常令朝官三兩人面奏時政得失庶有宏益

貞元十四年二月太常卿齊抗奏元日朝賀奏事戶部尚書司天監奏開元禮並令於橫班同羣官拜訖然後依次奏事自後並未拜以前先就階上立奏事畢隨例便退既無禮度則有關儀今請依開元禮戶部尚書以

上於南班再拜訖便隨上公升于階就東向位立准儀注奏事以補舊儀可之

十八年七月嘉王府諮議高宏本正衙奏事自理逋債因下勅曰比來百官每於止衙奏事至於移時爲弊亦甚自今以後不須於正衙奏事如要陳奏者並於延英進狀請對

正衙奏事不易之制貞觀之間孜孜治道講陳政事其後正衙奏御凡在列位無不上進

今宏本自理罪之可也囚人而廢其事不可

長慶二年七月御史臺奏文武常叅官閣內奏事近年無例昨者威衛將軍高扶援引德音迴出班位緣非彈

奏本條未敢舉勘起今以後其文武常叅官應有諫論合守進狀常例有違卽請奏彈從之

會昌元年六月勅今後應有朝官及上封事人進章表論人罪惡並須證驗明白狀中仍言請付御史臺不得更云請留中不出如軍國要機事關密切不在此例親王及朝臣行立位

貞觀十二年正月十五日禮部尚書王珪奏言三品以上遇親王于途皆降乘違法申敬有乖儀注上曰卿輩皆曰崇貴卑我兒子乎特進魏徵進曰自古迄茲親王

班在三公之下今三品皆天子列卿乃八座之長爲王降乘非王所宜當也求諸故事則無可憑行之于今又乖國憲上曰國家所以立太子者擬以爲君也然則人之修短不在老幼設無太子則母弟次立以此而言安得輕我子也徵又曰殷家尚質有兄終弟及之義自周以降立嫡以長所以絕庶孽之窺窬塞禍亂之源本爲國者宜知所慎于是遂可珪奏

開元六年八月一日右散騎常侍褚無量上疏曰臣謹詳諸史氏案以禮經有親親之義尊尊之道所以重王

室敬耆年今陛下續舊惟新睦親尚齒朝儀品列宜更申明至若命以嗣主用崇主祭養夫國老蓋在乞言會于朝班合從上列准令嗣王正一品今乃居庶官之次頗爲閙雜須有甄明臣伏見開府儀同三司在三品前立望請嗣王亦與開府同行諸致仕官各于本司之上則重親尚齒典禮式存五日勅九族旣睦百官有序至于班列宜當分位嗣王實光于主祭國老有貴于乞言比在朝儀尚爲閒雜非所謂睦親敦舊之義也嗣王宜與開府儀同三司等致仕官各居本司之上用永爲常

七年八月勅諸王入朝及別恩近至朝叅日未入間于
便近處坐仍令所司陳設

建中元年十一月詔親王出閣就本列至貞元三年七

月詔宗廟尚爵朝廷尚官今嗣郡王爵雖居高官或在

下列于上官之上非制也至四年七月勅自今以後嗣郡王列于本官之下也

貞元二年十月九日御史臺奏每有慶賀及須上表並

合上公行之如無上公即尚書令僕以下行之其嗣王

合隨宗正若有班立位合依三品

四年七月二十七日勅今後嗣郡王列於官班之上庶
子宜在卿之上

文武百官朝謁班序

貞元二年六月御史中丞竇叅奏起今以後班七人以

上同日不到者請具名聞奏從之其年九月五日勅應

文武百官朝謁班序

中書門下侍中中書令同中書門下平章事各以本官序供奉官左右散騎常侍門下中書

侍郎諫議大夫給事中中書舍人起居郎及舍人左右補闕左右拾遺通事舍人在橫班序若入閣

即各隨左右省其御史大夫中丞侍御史左殿中侍御

史在右通事舍人

分左右立

若橫行參賀辭見

御史大夫在散騎常侍之上中

丞在諫議大夫之下

御史臺

御史大夫在三品官之上別立中丞在五品官之上別立

留守副

元帥都統節度使觀察使都團練都防禦使并大都督

大都護持節度者即入班在正官之次餘官兼者各從

本官班序

御史在六品班之後也

諸使司下無本官准授內供奉

裏行者即入班亦在正官之次有本官兼者各從本官

班序如本官不是常參官并憲官是攝者惟聽於御史

班中辭見殿中省官監少監尚衣尚舍尚輦奉御分左

右隨織扇立若入閣亦如之

一品班

三太三公太子三太嗣郡王散官開府儀同

三司爵開國公等同班

二品班

尚書左右僕射太子三少京兆河南牧大都

督大都護散官特進光祿大夫爵開國郡公開國縣公

并勳官上柱國柱國同

三品班

六司尚書太子賓客九寺卿國子祭酒三監

京兆等七府尹詹事親王傳中都督上都護下都護下

都督上州刺史五大都督府長史上都督府下都護散

官金紫光祿大夫爵開國侯勳上護軍下護軍

四品班 尚書左右丞六司侍郎太常少卿宗正少卿
左右庶子秘書少監左右七寺少卿國子司業少府秘
書少監京兆河南太原少尹少詹事左右諭德家令率
更令僕親王府長史司馬鳳翔等少尹中州刺史下州
刺史大都督大都護司馬散官正議大夫通議大夫大
中大夫中大夫爵開國伯勳官上輕車都尉輕車都尉
五品班 尚書諸司郎中國子博士都水司使者萬年
等六縣令太常宗正秘書丞著作郎殿中丞尚食尚藥
尚舍尚輦奉御大理正中允左右贊善中書舍人洗馬

親王諮議友散官中散大夫朝請大夫朝散大夫爵開
國子開國男勳官上騎都尉騎都尉

武班供奉宣政殿前立位 從北千牛連行立次千牛
中郎將次千牛將軍一人次過狀中郎將一人次接狀
中郎將一人次押柱中郎將一人次又押柱中郎將一
人次排階中郎將一人次又押散手仗中郎將一人以
上在橫階北次南金吾左右大將軍入閣升殿夾階座
左右從南千牛將軍一人次千牛郎將一人次千牛將
軍一人次千牛連行立柱外過狀中郎將一人接狀中

郎將一人次押柱中郎將一人次又押柱中郎將一人
排階中郎將一人階下排散手仗中郎將一人金吾將
軍俱分左右立應當本日入閣人各依前件立其不合
入閣人各依本職事立非當上人遇合叅日並從本官
品第班序其入閣升殿除千牛衛將軍中郎將外餘並
以左右衛中郎將充其諸衛及率府中郎將皆不得升
殿

一品班 郡王散官驃騎大將軍爵國公

二品班 散官輔國大將軍鎮國大將軍爵開國郡公

開國縣公勳官上柱國柱國

三品班 左右衛左右金吾衛左右驍衛左右武衛左
右威衛左右領軍衛左右監門衛左右千牛衛大將軍
諸衛將軍散官冠軍大將軍雲麾將軍爵開國侯勳官
上護軍護軍

四品班 左右千牛衛左右監門衛中郎將親勳翊衛
中郎將太子左右衛太子左右衛司率清道內率監門
副率太子親勳翊衛中郎將上府折衝都尉中府折衝
都尉散官忠武將軍壯武將軍宣威將軍明威將軍爵

開國伯勳官上輕車都尉輕車都尉

五品班 親勳翊衛郎將軍太子親勳翊衛郎將親王

府典軍親王府副典軍下府折衝都尉上府果毅都尉

散官定遠將軍寧遠將軍游騎將軍游擊將軍爵開國

子開國男勳官上騎都尉騎都尉

尚書省官 據周禮先叙六官准六典尚書爲百官之

本今每班請以尚書省官爲首

東宮官王府官外官 東宮官旣爲宮臣請在上臺官

之次王府官又次之 太三少賓客右庶子王傅旣爲

師傅賓相不同官屬請仍舊

太常宗正丞 並隨寺望合在秘書丞上

尚食奉御尚藥奉御 本局旣隸殿中省合在殿中丞

之下

諸王府官 行列合以王長幼爲序

檢校官兼官及攝試知判等官 並在同位正官之次

其有行所檢校兼試攝判等官職事者卽依正官班叙

除留守副元帥都統節度使觀察使都團練都防禦使

并大都督大都護持節兼外餘應帶武職事位在西班

仍各以本官品第爲班序

含元殿前龍尾道下叙班 舊無此儀惟令於通乾觀象門南叙班自李若水任通事舍人奏更於龍尾道下叙班旣非典故今請停廢

文武官行立班序 通乾觀象門外序班武次於文至宣政門文由東門而入武由西門而入至閣門亦如其退朝並從宣政西門而出

文官充翰林學士皇太子侍讀諸王侍讀武官充禁軍職事准舊例並不常朝叅其翰林學士大朝會日准興

元元年十二月二十九日勅朝服班序宜准諸司官知制誥例在集賢史館等諸職事者並請朝叅訖各歸所務

辭見晏集班列先後 請依天寶三載七月二十八日禮部詳定所奏勅公式令諸文武官朝叅行立二王後位在諸王侯上餘各依職事官品爲序職事同者以齒致仕官各居本品之上若職事與散官勳官合班列文散官在當階職事者之下武散官次之勳官又次之官同者異姓爲後若以爵爲班者爵同者亦准此其男以

上任文武官者從文武班若親王嗣王任卑者職事仍依本品郡王在三品以下職事官在階品上自外無文武官者嗣王在太子太保下郡王次之國公在正三品下郡公在從三品下縣公在正四品下侯在從四品下伯在正五品下子在從五品下男在從五品下即前資官被召見及赴朝參致仕者在本品見任上以理解官在同品下其在本司參集者各依職事諸司散官三品以上在京者正東朝會依百官例自餘朝集及須別使臨時聽勅進止

儀制令 諸在京文武官職事九品以上朔望日朝其文武官五品以上及監察御史員外郎太常博士每日朝參文武官五品以上仍每月五日十一日二十一日二十五日參三品以上九日十九日二十九日又參當上日不在此例其長上折衝果毅若文武散官五品以上直諸司及長上者各准職事參其宏文館崇文館及國子監學生每季參若雨露失容及泥潦並停諸文武九品以上應朔望朝參者十月一日以後二月二十日以前並服袴褶五品以上者著珂繖周喪未練大功未

葬非供奉及諸宿衛官皆聽不赴

常叅文武官准令每日叅自艱難以來人馬劣弱遂許分日望許依前分日叅待戎事稍平加其俸祿卽依常式其武官准令五品以上每月六叅三品以上更加三叅頃並停廢今請准令却復舊儀其朔望朝叅及宏文館崇文館國子監學生每季叅等請續商量聞奏以前御史中丞竇叅等奏伏奉今年四月三日勅宜付所司與御史臺以近日體例叅議禮文務從簡正詳定訖聞奏者臣等准勅詳定如前勅旨二品武班宜以左右金

吾等十六衛上將軍依次爲班首其檢校官兼及攝試知判等本官二品以上者位望崇重禮異羣僚宜依本班朝會餘依十三年十月徐泗卽度使張建封入朝觀詔叅帶入大夫班亦優禮也二十年十月御史中丞武元衡奏准貞元二年班序勅使下三院御史有本官是常叅官兼者卽入本官班如內供奉裏行卽入御史班緣使下御史近例並不在內供奉班內請自今以後諸使下御史內供奉者入閣日并依宣政殿前班位次員外郎之後在正臺監察御史之上使爲常式從之

二十一年五月御史臺奏准貞元二年九月班序勅已
有定制其橫行位次請一切依本班先後如遇雨泥廊
下立班卽依舊位又常叅官辭見班令緣御史多帶兼
官高下不等今請兼大夫者在諸司四品之上丞郎及
供奉官五品之下兼中丞者在諸司五品之上供奉官
五品之下兼侍御史者在諸司六品之上供奉官六品
之下兼殿中監察者在諸司七品之上及供奉官本品
之下如本官帶常叅官攝御史者依本官班序仍舊例
准久辭見如本官不是常叅官攝御史者不在此例又

諸文武官朝叅行立各依職事官品爲序者緣有檢校
官高職事官卑及嗣王郡王任職事官高卑不等今請
應檢校僕射尚書以上及嗣王郡王任職事官者一切
在職事本品之上又准紫宸門外班除供奉官餘其一
切宜政殿前班序登階後任依舊位如違請准乾元元
年三月勅奪一月俸依奏本品同職事官班序
元和元年四月御史中丞武元衡奏貞元二年御史中
丞竇叅奏凡諸使兼憲官職除元帥都統節度使觀察
都團練防禦等使餘並列在本官之位請自今以後常

叅官御史大夫中丞者准檢校省官例立在本品同類官之上從之

會昌二年十月中丞李回奏准元和元年四月勅常叅官兼御史大夫中丞立在本品同類官之上自後尚書諸司侍郎兼憲官與左右丞不常並置至於序立式有所疑臣伏請依前遵守永爲定制依奏尚書左丞孫簡奏伏以班位等差本係品秩近者官兼臺省立位稍遷頗紊爨制理亦未通今據臺司重舉元和元年所奉勅常叅官兼大夫中丞者准檢校官立在左右丞之上者

承前列曹侍郎兼大夫者至少准京兆尹往往帶此官其京兆尹是從三品至今班位只在本品同類官從三品卿監之上在太常宗正卿三品之下其尚書左丞是正四品上戶部侍郎是正四品下今戶部侍郎兼大夫只合在本品同類官正四品下諸曹侍郎之上不合在正四品丞郎之上與京兆尹在正三品卿監之下無異又據尚書右丞是正四品下吏部侍郎是正四品上今吏部侍郎班位在右丞之下蓋以右丞官居省轄職在糾繩吏部侍郎品秩雖高猶居在下推此言之則左丞

品秩既高又處綱轄之地戶部侍郎雖兼大夫豈可驟居其上今據散官自將侍郎上至開府特進每品從上下名級各異則從上下又不得謂之同品今取於理切近者用以比方今京兆河南司錄及諸州錄事叅軍皆操紀律糾正諸曹與尚書省左右丞綱紀六典畧同設使諸曹掾因其功勞朝廷就加臺省官立位豈得使在司錄及錄事叅軍之上施於州縣尚謂非宜況在朝廷實爲倒置且尚書左丞自置此官職業至重按六典得彈射八座主省內禁令及宗廟祠祭之事御史糾劾不

當得彈奏之豈可不究是非輕爲措置今臺司所奏但言往例曾不揣摩事若循理雖無往例亦合遵行事若非宜雖有往例便合改正今據元和元年臺司所奏勅戶部侍郎兼大夫班位合在兵部侍郎之上在左右丞吏部侍郎之下今若因循往例不宜改正遣戶部侍郎兼大夫位在左右丞之上則京兆尹兼御史大夫班位合在太常宗正卿之上不唯有紊典章實恐重違元勅謹具貞元二年以後勅旨如前伏乞重賜叅詳庶合事理勅旨緣御史臺與臺省各執所見因此須爲定制其

宜令兩省官詳議聞奏自谷將河原因北原為或備其
三年二月庫部郎中知制誥崔于奏兼御史大夫中丞
一班位奉勅宜令兩省官詳議聞奏者伏以御史大夫
中丞掌邦國憲法朝廷紀綱兼此官者皆以所領務重
時為寵獎近來諸司侍郎兼大夫者並在左右丞之上
相承不改待之已久況今使下監察御史裏行朝謝之
時列在左司郎中之上以此叅比足可辨明况奉去年
十月勅御史大夫進為正三品寺丞進為正四品下郎
官望等裏九重往時酌從宜之文定可久之法合崇憲

聯試叶朝儀請准前例諸行侍郎兼御史大夫中丞者
在尚書左丞之上勅宜依崔于等所奏

三月二十一日...
 四月...
 五月...
 六月...
 七月...
 八月...
 九月...
 十月...
 十一月...
 十二月...



